

Annulaziun dalla radunanza communal Surses

La suprastanza communal ha decidì d'annullar a curta vista la radunanza communal convocada per igls 30 da november 2020.

Ella reagescha uscheia sen ena petiziun sottascritga da bung 180 persungas, tgi pretenda d'annullar la radunanza communal e da sottametter igls numerous affars an pe agl cumegn d'urna. Argumentada vign la petiziun cun igl fatg, tgi bleras votantas e votants vegian tema da neir infectos digl coronavirus e vignan cotras betg alla radunanza communal. Uscheia fissigl da spitgier cun ena pitschna participaziun, tgi fiss betg represchentativa.

La suprastanza communal constatescha tgi

- mintga radunanza communal convocada tenor prescripziun è cumpetenda da decider, independent dalla participaziun.
- gl'è lubia da manar tras radunanzas communalas alla basa dallas prescripziuns pertutgont las maseiras cunter la pandemia da corona.
- tenor l'ordinaziun davart igl dretg d'urgenza on igls cumegns la pusebladad da sottametter igls affars all'urna anstagl dalla radunanza communal. Chegl schinavant tgi igl cumegn dispona p.ex. betg da localitads adattadas per organisar la radunanza u schi existan indezis serious tgi fitg bleras persungas cun dretg da votar na vignan betg a sa participar alla radunanza communal, an spezial schi blera gliout è an curantegna e so uscheia betg participar alla radunanza. An noss cumegn è chegl betg igl cass.
- schi vign decidia alla basa dall'ordinaziun d'autorisaziun sen basa digl dretg d'urgenza da sottametter en affar agl cumegn d'urna, on siva tot igls oters affars er da neir tractos all'urna anfignen tgi l'ordinaziun menziunada vign puspe annullada.
- schi vign fatg adiever dall'ordinaziun sen dretg d'urgenza, stò igl cumegn - avant da sottametter en affar all'urna - organisar obligatoricamaintg ena consultaziun adequata ed orientar an moda transparenta davart igls resultats dalla consultaziun. Per manar tras ed evaluar ena consultaziun ègl da chintar cun en spazi da taimp da 4 anfignen 6 emdas.
- da calcular, schi en affar ò duple success tar la radunanza communal u all'urna, è nign muteiv per sottametter en affar all'urna anstagl dalla radunanza. La costituziun fixescha las cumpetenzas digls organs communal.

La suprastanza communal accepta perancunter l'objecziun, tgi la glista da tracandas dalla radunanza communal convocada igls 30 da november è sot las circumstanzas actualas mengia lunga. Per tala raschung vign la radunanza communal digls 30 da november annullada e convocada da nov sen igls 14 da december 2020. An chella vign tracto igl preventiv 2021 ed igls credits per igls projects d'investiziun. Sainza en preventiv approvo fiss igl cumegn numnadamaintg blocco e savess betg exequair las sias incumbensas. La votaziun davart la renovaziun digl contract digl parc Parc Ela vign fatga a caschung d'ena ulterioura radunanza communal igls 25 da schaner 2021. Chegl considero igl fatg tgi chella dumonda sveglia emeziuns e vign probablamaintg a cuzzar pi dei per tractar. Pinavant sarò la tema tg'igl contract digl parc savess neir nego stada la raschung per aveir inoltro la petiziun. Las invitaziuns allas radunanzas communalas correspondentas vignan tarmessas a taimp allas votantas ed agls votants.

Nous supplitgagn da piglier cunaschientscha e speragn sen vossa tgapientscha.